

Muzzicuna d'amuri

Fruttu d'ingannu, di tradimentu,
viìculu di cuntrasti, di odii, di tragèdii.
Foru ittati fora di lu jardinu dill'Eden.
Ddu fruttu, era l'unicu ca nun s'avivànu
a manciari, nun avivànu a tradiri
chiddu chi cci fu raccumannatu.

Ora nun nnè cchiù viìculu
di guerra ma di paci e amuri.
Pumu nun muzzicatu, ma vasatu
di du labbra villutati russi,
labbra frischi, amurusi,
chi ristàru 'ncisi 'nta la scorcia.

Segnu d'amicizia, d'amuri, viìculu, ora,
di alianza, simbulu di vita. Prima di tuttu,
vasu li to labbriceddi di russu pittati, po
muzzicu lu pumu unni tu lassasti l'impronta
di li to labbra, nni gustu lu sapuri, accussi
tu, duci duci trasi dintra di mia pi èssiri amata.

Sulu nni 'stu modu po èssiri me.
Nni pigliu sulu un maccicuni, ma è chinu
di lu to sapiri, di lu to amuri, fazzu me lu to
sorrisu, lu to profùmu, po nni lu manciamu
'nsemmula, accussi l'unu trasi nill'atru,
nni la frischizza, nni l'essenza di l'amuri.

Muzzicuni dopu muzzicuni rimasi sulu
la simenza, dopu la siminamu cu cura
nni lu fertili tirrenu di li nostri cori,
e la cuncimamu cu affettu e cu amuri,
accussi jornu dopu jornu lu nostru amuri
crisci si rafforza, si fa cchiù granni.

E ancòra cchiù granni, cchiù granni.

2018 Giuseppe Cardella